



**UNIVERSITI TEKNOLOGI MARA**

---

**PEKELILING PENDAFTAR**

---

**Bilangan 10 Tahun 2017**

**DASAR BAHARU CUTI TANPA GAJI BAGI PEGAWAI YANG MENGIKUT PASANGAN BERTUGAS ATAU BERKURSUS DI DALAM ATAU DI LUAR NEGARA**

**TUJUAN**

1. Pekeliling ini bertujuan memaklumkan mengenai dasar baharu kemudahan Cuti Tanpa Gaji (CTG) kepada staf UiTM yang mengikut pasangan bertugas atau berkursus sama ada di dalam atau di luar negara.

**LATAR BELAKANG**

2. Dasar dan peraturan berkaitan kemudahan CTG kepada pegawai yang mengikut pasangan mereka bertugas atau berkursus, sama ada di dalam atau di luar negara telah dijelaskan melalui Pekeliling Perkhidmatan Bilangan 29 Tahun 2009 (PP 29/2009). Dasar sedia ada berkaitan CTG mengikut pasangan adalah seperti berikut:

- a. Tempoh maksimum CTG mengikut pasangan termasuk tempoh pelanjutan yang boleh diluluskan kepada pegawai yang pasangannya merupakan pegawai awam adalah mengikut tempoh pasangan pegawai dikehendaki bertugas/berkursus;
- b. bagi pegawai yang pasangannya bukan pegawai awam, tempoh maksimum CTG mengikut pasangan yang boleh diluluskan adalah tiga (3) tahun atau selama tempoh pasangan pegawai dikehendaki bertugas/berkursus, mengikut tempoh mana yang lebih pendek. Tempoh pelanjutan CTG boleh diluluskan mengikut baki tempoh CTG yang pegawai berkecukupan, terhadap tempoh keseluruhan CTG adalah tiga (3) tahun; dan

- c. pegawai dikehendaki memenuhi syarat kembali berkhidmat selama satu (1) tahun selepas tempoh CTG termasuk tempoh yang dilanjutkan tamat, bagi membolehkan permohonan CTG mengikut pasangan berikutnya dipertimbangkan

3. Walau bagaimanapun, selaras dengan era globalisasi, semakin ramai rakyat Malaysia yang bertugas di luar negara sama ada berkhidmat dengan agensi Kerajaan, agensi antarabangsa, atau pun syarikat swasta. Sehubungan itu, mengambil kira faktor kebajikan pegawai, kemudahan ini ditambah baik bagi membolehkan pegawai dapat bersama dengan pasangan mereka sepanjang tempoh bertugas atau berkursus.

4. Mesyuarat Majlis Sumber Manusia UiTM ke-11 pada 12 Januari 2017 telah bersetuju memperakukan cadangan pemakaian Pekeliling Perkhidmatan Bilangan 5 Tahun 2016 - Dasar Baharu Cuti Tanpa Gaji Bagi Pegawai yang Mengikut Pasangan Bertugas Atau Berkursus Di Dalam Atau Di Luar Negara.

5. Mesyuarat Lembaga Pengarah Universiti Ke-156 pada 16 Januari 2017 membuat keputusan meluluskan cadangan mengguna pakai Pekeliling Perkhidmatan Bilangan 6 Tahun 2016 - Dasar Baharu Cuti Tanpa Gaji Bagi Pegawai Yang Mengikut Pasangan Bertugas atau Berkursus Di Dalam Atau Di Luar Negara.

#### **PELAKSANAAN DASAR BAHARU**

6. Tempoh CTG bagi pegawai yang pasangannya pegawai agensi awam atau bukan pegawai agensi awam adalah mengikut tempoh pasangan bertugas/berkursus dan pegawai tidak tertakluk kepada syarat kembali bertugas selama satu (1) tahun untuk permohonan CTG berikutnya.

7. Kemudahan CTG mengikut pasangan layak dipertimbangkan kepada staf bertaraf tetap termasuk staf yang belum disahkan dalam perkhidmatan.

8. Staf lantikan sementara atau kontrak tidak layak dipertimbangkan kemudahan CTG mengikut pasangan.

## **PRA SYARAT PERMOHONAN CTG MENGIKUT PASANGAN**

9. Staf yang ingin mengikut pasangan mereka bertugas atau berkursus sama ada di dalam atau di luar negara boleh dipertimbangkan CTG mengikut pasangan tertakluk pasangannya memenuhi syarat seperti berikut:

- a. Pegawai agensi awam yang telah diarahkan bertugas atau diluluskan berkursus oleh Ketua Jabatannya; atau
- b. Pekerja agensi swasta atau agensi antarabangsa yang dilantik/diarahkan bertugas atau diluluskan berkursus oleh agensi swasta atau agensi antarabangsa
- c. Jika pasangan pegawai bukan terdiri daripada mana-mana pegawai di perenggan (a) atau (b), mereka hendaklah:
  - i. telah dianugerahkan bantuan kewangan oleh Kerajaan Malaysia atau oleh mana-mana institusi di dalam negara atau di luar negara yang menawarkan pembiayaan untuk berkursus; atau
  - ii. telah disahkan menerima tawaran dan seterusnya melaporkan diri untuk mengikuti kursus oleh institusi pengajian bagi mereka yang berkursus atas perbelanjaan sendiri; dan
  - iii. mana-mana pegawai yang tidak termasuk dalam perenggan (a), (b) atau (c) yang memerlukan pegawai berada bersama pasangan dalam menjalankan tugas-tugas terutama yang melibatkan kepentingan jawatan tertentu iaitu Anggota Pentadbiran seperti Menteri dan Timbalan Menteri.

## **PROSEDUR PERMOHONAN CTG MENGIKUT PASANGAN**

10. Permohonan/Pelanjutan CTG mengikut pasangan perlu dikemukakan kepada Bahagian Pengurusan Perkhidmatan (BPP), Pejabat Pendaftar sekurang-kurangnya tiga (3) bulan sebelum tarikh mula CTG berkenaan.

11. Tempoh CTG yang boleh diluluskan adalah mengikut tempoh pasangan bertugas/berkursus.

12. Staf hanya boleh CTG mengikut pasangan setelah mendapat kelulusan daripada Pejabat Pendaftar dan tindakan **tatatertib** boleh diambil sekiranya staf didapati gagal mematuhi.

#### **PENGISIAN JAWATAN**

13. Ketua Jabatan dalam menimbangkan permohonan CTG mengikut pasangan hendaklah memberi pertimbangan sewajarnya setelah mengambil kira keperluan perkhidmatan supaya penyampaian perkhidmatan tidak terjejas khususnya dalam perkhidmatan kritikal.

14. Jawatan yang dikosongkan boleh diisi bagi tempoh sementara sama ada melalui pelantikan secara kontrak (*Contract of Service*) atau pemangkuan. Tugas jawatan yang kosong tersebut juga boleh dilaksanakan secara penanggungungan kerja atau kaedah lain yang bersesuaian.

#### **PENAMATAN CUTI TANPA GAJI**

15. Pihak UiTM boleh pada bila-bila masa menamatkan tempoh CTG serta mengarahkan staf untuk kembali melaporkan diri bertugas sekiranya wujud keperluan mendesak untuk mendapatkan perkhidmatan pegawai yang sedang CTG mengikut pasangan. Tindakan tatatertib boleh diambil sekiranya pegawai didapati gagal mematuhi arahan untuk melaporkan diri bertugas.

#### **PEGAWAI DALAM TEMPOH PERCUBAAN**

16. Tempoh percubaan bagi staf yang belum disahkan dalam perkhidmatan akan dibekukan sepanjang tempoh CTG mengikut pasangan yang diluluskan dan baki tempoh percubaan akan disambung apabila pegawai kembali bertugas. Walau bagaimanapun, staf boleh dipertimbangkan untuk mengikuti kursus Program Transformasi Minda (PTM) atau menduduki peperiksaan perkhidmatan bagi tujuan pengesahan dalam perkhidmatan dengan perbelanjaan ditanggung oleh staf.

17. Staf yang telah memenuhi semua syarat pengesahan dalam perkhidmatan sebelum diluluskan CTG mengikut pasangan boleh disahkan dalam perkhidmatan sehari selepas tarikh pegawai memenuhi semua syarat pengesahan dalam perkhidmatan yang ditetapkan. Bagi staf yang memenuhi semua syarat pengesahan dalam perkhidmatan semasa bercuti, tarikh pengesahan boleh ditetapkan mulai tarikh pegawai melaporkan diri bertugas.

#### **PERGERAKAN GAJI TAHUNAN**

18. Pegawai yang telah diluluskan CTG mengikut pasangan melebihi 180 hari dalam satu (1) tahun kalendar adalah layak dipertimbangkan pergerakan gaji secara isyarat. Pergerakan gaji secara isyarat tersebut adalah tertakluk kepada maksimum sebanyak tiga (3) kali bagi sepanjang tempoh perkhidmatan (sama ada perkhidmatan tetap, sementara dan/atau kontrak di Perkhidmatan Awam Persekutuan, Perkhidmatan Awam Negeri, Pihak Berkuasa Tempatan dan/atau Pihak Berkuasa Berkanun), termasuk pergerakan gaji secara isyarat yang telah diberikan di bawah semua keadaan lain.

19. Tiada pergerakan gaji secara isyarat dipertimbangkan setelah pegawai mendapat pergerakan gaji tahunan secara isyarat sebanyak tiga (3) kali tersebut. Tarikh pergerakan gaji (TPG) tahunan pegawai adalah tidak berubah.

#### **KEKANANAN DAN KENAIKAN PANGKAT**

20. Staf akan hilang kekananan selama tempoh CTG mengikut pasangan. Tempoh CTG juga merupakan tempoh perkhidmatan yang tidak diambil kira bagi tujuan kenaikan pangkat berasaskan tempoh perkhidmatan. Staf layak dipertimbangkan kenaikan pangkat sekiranya telah memenuhi syarat yang ditetapkan dalam skim perkhidmatannya sama ada sebelum CTG mengikut pasangan bermula atau semasa dalam tempoh CTG berkenaan.

#### **STATUS PEGAWAI SEMASA BERCUTI**

21. Dalam tempoh CTG mengikut pasangan, staf masih merupakan pegawai awam yang tertakluk kepada peraturan tata tertib yang berkuat kuasa. Tempoh cuti ini hendaklah tidak disalahgunakan untuk tujuan lain seperti melakukan pekerjaan yang dibayar upah

tanpa kebenaran Ketua Jabatan. Sekiranya pegawai didapati melanggar mana-mana peraturan, pegawai boleh dikenakan tindakan tatatertib.

22. Kesan ke atas perkhidmatan bagi pegawai yang diluluskan CTG mengikut pasangan hendaklah dirujuk kepada Surat Pekeliling Perkhidmatan Bil. 4 Tahun 2009 atau peraturan semasa yang berkuat kuasa.

#### **KEMUDAHAN PERUBATAN**

23. Staf yang pasangannya bukan pegawai agensi awam tidak layak sebarang kemudahan perubatan di luar negara yang dibiayai oleh Kerajaan.

24. Bagi staf yang pasangannya pegawai agensi awam kemudahan rawatan perubatan di luar negara adalah tertakluk kepada syarat-syarat yang berkuat kuasa.

#### **KEMUDAHAN PERLINDUNGAN INSURAN**

25. Staf digalakkan mendapatkan perlindungan insuran merangkumi rawatan perubatan, kecacatan kekal dan kematian/ kos pengurusan/ pengangkutan jenazah dan lain-lain lagi dengan perbelanjaan ditanggung oleh staf.

#### **KEMUDAHAN CUTI**

26. Staf tidak perlu menghabiskan semua Cuti Rehat yang berkecukupan sebelum menggunakan kemudahan CTG mengikut pasangan. Walau bagaimanapun, baki cuti rehat yang tidak dihabiskan sebelum CTG akan luput tertakluk kepada peraturan sedia ada yang berkuat kuasa.

27. Secara prinsipnya, hanya satu kemudahan cuti boleh digunakan dalam satu masa. Justeru itu, staf yang telah diluluskan CTG mengikut pasangan adalah tidak layak menggunakan kemudahan cuti-cuti lain yang berkuat kuasa sepanjang tempoh CTG mengikut pasangan tersebut.

28. Kemudahan CTG mengikut pasangan di bawah pekeliling perkhidmatan ini tidak menjejaskan kelayakan staf menggunakan kemudahan CTG di bawah Perintah Am 14 dan Perintah Am 52 Bab C (Cuti) tahun 1974, atau pindaannya dari semasa ke semasa. Namun begitu, tempoh CTG mengikut pasangan ini adalah tidak diambil kira bagi tujuan tempoh perkhidmatan yang melayakkan untuk pengiraan cuti yang dikira berdasarkan tempoh perkhidmatan.

#### **IKATAN PERJANJIAN**

29. Jika staf masih ada ikatan untuk berkhidmat dengan kerajaan, tempoh CTG mengikut pasangan tidak boleh diambil kira sebagai tempoh sedang berkhidmat bagi tujuan menyelesaikan tempoh ikatan perjanjian sebelumnya. Staf dikehendaki menyempurnakan ikatan perjanjian tersebut setelah kembali berkhidmat.

#### **FAEDAH PERSARAAN**

30. Tempoh CTG mengikut pasangan yang diluluskan tidak akan diambil kira untuk tujuan perkiraan faedah persaraan sebagaimana yang diperuntukkan di bawah undang-undang pencen yang berkuat kuasa.

#### **PEMBATALAN**

31. Dengan berkuatkuasanya Pekeliling Perkhidmatan ini, Pekeliling Perkhidmatan Bilangan 29 Tahun 2009 - Cuti Tanpa Gaji Bagi Pegawai Yang Mengikuti Pasangan Bertugas Atau Berkursus Di Dalam Atau Di Luar Negari adalah dibatalkan.

#### **TARIKH DIKELUARKAN**

32. Pekeliling dikeluarkan pada 22 Februari 2017.

## TARIKH KUAT KUASA

33. Pekeliling ini berkuat kuasa pada 7 November 2016.

## PEMAKAIAN

34. Pekeliling ini adalah terpakai kepada semua staf Universiti Teknologi MARA.



**AZIDA AZMI**  
Pendaffar

Dikelilingkan Kepada:  
Semua Ketua Jabatan/ Bahagian/Pusat/ Unit  
Semua Dekan-Dekan Fakulti  
Semua Rektor-Rektor UITM Cawangan

Bil. Fail : 100-BPD(PT. 6/3)  
No Siri : 100-BPD(Bil.09/2017)